



Arkivnr: 2014/13696-58

Saksbehandlar: Even Vaular

Saksframlegg

Saksgang

Utval	Saknr.	Møtedato
Fylkestrafikksikringsutvalet i Hordaland		05.06.2018

Tilskot til utarbeiding av kommunale trafikksikringsplanar 2018

Samandrag

Det er eit ynskje hjå fylkeskommunen at alle kommunane i Hordaland til ei kvar tid har oppdaterte trafikksikringsplanar der det går fram kva for utfordringar kommunen har på trafikksikringsområdet gjennom ulukkesstatistikk og kartleggingsarbeid, saman med konkrete forslag til korleis arbeidet skal følgjast opp både gjennom fysiske og trafikantretta tiltak. I budsjettet for 2018 er det sett av 330.000 kroner til denne tilskotsordninga.

Til fristen 1. mai 2018 kom det inn tre søknadar, med ein samla søknadssum på 605.000 kr.

Økonomi: Tilskotsmidlane er henta frå budsjetterte midlar disponert av fylkestrafikksikringsutvalet.

Klima: Tilskot til utarbeiding av kommunale trafikksikringsplanar vil ha ingen eller liten verknad på klimaet. Trafikksikringsplanar *kan* vera verktøy for å auka delen av gåande og syklende, og slik redusera forureinande biltrafikk.

Folkehelse: Sjå «Klima» ovanfor. Fleire gåande og syklende er bra for folkehelsa, det same er tryggleik.

Regional planstrategi: Satsing på trafikktryggleik er viktig for å utvikla attraktive nærmiljø og regionsenter i fylket, og for å styrka konkurransekrafta til gange og sykling som klimavenlege transportformer.

Forslag til vedtak

1. Askøy kommune får tildelt tilskot på kr. 130.000 til utarbeiding av kommunal trafikksikringsplan.
2. Ulvik herad får tildelt tilskot på kr. 200.000 kr til utarbeiding av kommunal trafikksikringsplan

Rune Haugsdal
fylkesrådmann

Håkon Rasmussen
fylkesdirektør samferdsel

Saksframlegget er godkjent elektronisk og har derfor inga underskrift.

Vedlegg

- 1 Trafikksikringsplan 2018-2025 Ulvik herad. Oppstart og finansiering. VEDTAK
- 2 Søknad på tilskot til utarbeiding av kommunal trafikksikringsplan - Ulvik herad
- 3 Odda kommune - søknad om tilskot til TS-plan
- 4 Askøy kommune - søknad om tilskot til TS-plan
- 5 Askøy kommune - innhenting av uttaler til TS-plan

Fylkesrådmannen, 22.05.2018**Bakgrunn**

Fylkestrafikksikringsutvalet (FTU) delar kvart år ut midlar til utarbeiding av trafikksikringsplanar i kommunane. I FTU sitt budsjett for 2018¹ vart det sett av 330.000 kr til tilskotsordninga. Kommunale trafikksikringsplanar er viktige når fylkeskommunen skal prioritera trafikksikringstiltak, både gjennom ordinære budsjett og tilskotsordningar.

Tilskotet kan gå til kjøp av konsulenttenester og trykking. Tilskotet kan ikkje gå til bruk av administrative kostnader og driftsutgifter. Fylkeskommunen er høyringspart for planen, og endeleg plan skal sendast til Hordaland fylkeskommune.

Om søknadane

Til søknadsfristen 1. mai kom det inn tre søknadar om tilskot. Søkjarane er Askøy kommune, Odda kommune og Ulvik herad.

Askøy kommune har starta prosessen med å rullera gjeldande trafikksikringsplan, som går ut i 2018. Dei er i en fase der dei hentar inn innspel frå ulike grupper i kommunen. Kommunen søker om støtte til bruk av konsulent, som skal systematisera innspel og bidra til å sikra framdrift i planprosjektet. Målet er politisk handsaming i kommunestyret i løpet av 2018. *Søknadssum: 175.000 kr*

Odda kommune sin siste trafikksikringsplan vart vedtatt i november 2009 og er for perioden 2010-2014. Dei søker no om støtte til ferdigstilling av ein skiltplan for Odda sentrum, då skiltplanverket ikkje er oppdatert, noko som gjer det vanskeleg å handheva og følgja opp ulovleg parkering og køyring. Kommunen er i ferd med å oppretta eit parkeringsselskap for Odda og omland som skal setja i verk skiltplanen når den er klar. Kommunen meiner skiltplanen vil verta «*eit viktig verktøy for å realisera ein god trafikksikringsplan*». Dei reknar med det vil gå om lag 150.000 kr med til bruk av konsulent i planarbeidet. *Kommunen søker om tilsvarende sum.*

Ulvik herad har i formannskapet 14. mars 2018 gjort vedtak om å starta opp arbeidet med kommunedelplan for trafikksikring, inkludert skiltplan. Dei har henta inn tilbod og skriv i sin søknad at planprosjektet er rekna til 300.000 kr, kor kostnader for bruk av konsulentonorar utgjer 280.000 kr. *Kommunen søker om tilskot (uspesifisert sum) til dekking av konsulentkostnader.*

Fylkesrådmannen sine kommentarar

Askøy kommune verkar å vera godt i gang med si rulling av gjeldande trafikksikringsplan. Dei legg vekt på brei medverknad frå innbyggjarar og sentrale aktørar og grupper i kommunen. *Fylkesrådmannen innstiller på eit tilskot på 130.000 kr.*

I gjeldande kommunal planstrategi for Odda kommune (2016-2019) er revisjon av trafikksikringsplanen sett til 2017-2018. Odda kommune søkte i 2016 om 400.000 kr i tilskot frå FTU-ordninga til revisjon av trafikksikringsplanen, og vart tildelt 175.000 kr i møte 27. april (politisk sak 16/2016). Revidert trafikksikringsplan er ikkje ferdigstilt, og det er usikkert kva som er status for arbeidet. Kommunen søker her om tilskot til ein skiltplan. Tilskotsordninga er retta mot utarbeiding av trafikksikringsplanar, og søknaden er

¹ Budsjettet vart vedtatt i FTU-møtet 20. februar i politisk sak 5/2018.

såleis ikkje i tråd med føremålet til ordninga. Ein godkjent skiltplan for Odda sentrum vil innebera at ein kan handheva trafikk og parkering betre enn i dag, noko som vil vera positivt for trafikktryggleiken i området. Likevel er ein skiltplan noko heilt anna enn ein plan som ser på heilskapen i det kommunale trafikksikringsarbeidet – frå fysiske til organisatoriske og haldningsskapande tiltak på tvers av den kommunale verksemda. Når det i tillegg allereie er utbetalt eit fylkeskommunalt tilskot til revisjon av trafikksikringsplanen, vil fylkesrådmannen rå til at Odda kommune *ikkje vert tildelt midlar til utarbeiding av skiltplan.*

I Ulvik herad er føresetnadane gode for at utarbeidinga av ny trafikksikringsplan med skiltplan vert gjennomført. Arbeidet er forankra politisk, konsulent er vald etter konkurranseutsetting og planprosessen er sikra finansiering. Det er nedsett ei politisk-administrativ prosjektgruppe som samarbeidar med konsulent. *Fylkesrådmannen innstiller på eit tilskot på 200.000 kr.*